

四庫全書

集部

欽定四庫全書

懷麓堂集卷六十五

明 李東陽 撰

文後稿五

記

重修瓊州府二賢祠記

瓊州府舊有二賢祠祀知府王徐二公者也王公諱泰字伯貞以字行吉之泰和人洪武間以前戶部主事起知瓊為政

寬簡崖州黎殺人報讐府衛以反聞欲兵之公保其無他捕
讐殺者數人遂定瓊田三獲軍賦不時受俟民乏急則斂而
倍入之公始令每獲必輸皆告便流民來歸者萬三千餘人
弘治十五年以內艱去民號泣攀送十餘里不絕徐公諱鑑
字子明常之宜興人宣德間自戶部郎中奉勅知瓊廉正竄
惡瓊多異產中使踵接公限有司弗予及行所部輒遣騎從
之俾不得肆武官利黎產多啟釁以邀賄公鎮以無事皆安堵
不為變民漸黎俗病不服藥惟殺牛祭鬼至鬻子女為禳禱

費公婉而導之民寢化皆感悅立生祠祀公比其卒巷
哭家祭柩還送者填海濱目送其舟至不見乃去蓋其
治祇四年視王公不及三之一而治狀相若人以為難
瓊民思二公不置祔祭于蘇文忠公祠事有不平者則
往訴之若官府然成化初知府蔣淇建祠于府治西醫
學故基標為今名久乃就圯弘治初知府張英改建於
御史行臺之右則今祠也議以春秋舉祀事復其民二
人俾世守焉會左叅議任君穀上京師請為記夫祭有

二義親與神之謂也賦形受氣一體而分幽明之相通聚散之相感焄蒿悽愴若或見之則存乎親上下四旁昭布森列善則福不善則禍比之賞罰影隨而響答則存乎神斯二者有所感各有所應精神魂氣之間潛乎默契有不容已者孔子祭如在祭神如神在為是故也若守令之祭於民者實兼二義而有之恩則父母靈則明神故桐鄉之於朱邑親之也羅池之於柳子厚神之也畫地而守分民而治去留生死之相代者其常也德

存而愛俱功立而名傳其去也有思其遠也有追膠固
纏結雖欲已之有不可得者是豈聲音笑貌儀文器數
可飾具而彊致哉顧今之守令不惟不獲乎下而反病
之故為之民者面背殊情死生異觀勉之恒常或忽之
倉卒者比比而是況累紀閱世少者壯壯者老而其子
孫苗裔若躬沐膏澤親炙風範愈久而不能忘者其難
易何如也乃或以遐方僻地諉於無所用治苟焉以為
政又從而徇之以幸其泯而弗彰然其實終有不可揜

者間二公之風亦可以少省矣厥後王公之子文端公
名直為翰林學士官至少傅徐公之孫今少傅公名溥
與文端同官學行勲績後先相望蔚為名臣皆以一品
官階贈及祖考朝有誥家有廟詩書簪組綿延而未艾
所謂盛德必百世祀者豈獨于其民徵之哉東陽以學
士典詞命遠繼文端比預機務從少傅公後獲考國史
及觀其家乘為詳併書以為記實弘治八年九月也

天津衛城修造記

天津及左右三衛其地曰直沽沽云者小水入海之名也蓋禹貢冀州之域在天文為箕尾之分勝國以前實海濱荒地潞衛二河南北相接以入於海胥此焉會我朝太宗文皇帝兵下滄州始立茲衛築城浚池立為今名則象車駕所渡處也衛既武置無州縣承平之餘故習未改則肆為彊戾訟獄繁起越愬京師者殆無虛日往來舟楫夫役之費不統于一下上病之朝廷乃用議者特置山東按察副使一人專督兵備而凡城池兵馬

詞訟盜賊之事皆隸之于時西蜀劉君實膺是選承勅以行君至則以為城池最重宜亟為之處顧乏帑積勢不可猝辦累歲而計每事而處徐而圖之增城為高甃而扁之隅方而準平又構樓于門曰鎮東曰定南曰安西曰拱北皆踰尋累丈平看俯瞰迴出塵垢而北樓尤絕特相倍往來命使及大夫士之有事于是者登眺之際神竦心暢瞻宮闕之尊崇覽畿甸之高腴周諏隱幽則器閔不生詢察吏治則糾紛不作於斯城也可以觀

政矣夫城之為制實取諸設險守國之義其來尚矣是必預制于平居無事之日乃可以保治于無窮顧凡有民社兵馬之寄者不加之意日頽月塞無復有經久制遠之具固識者所深慮也矧畿輔之近喉襟之要擁重兵置羣士而無以控制統馭之其可哉且鈞是地也鈞是政也匪得人以理之則治效不著然則天津之治亦固可誣也哉予又聞劉君積材穀籍丁戶第差役其所為役如治廟學脩祭器闢射圃立教場及諸祠宇工局

類皆就緒而城池尤重是其始末不可以不紀也天下之事成于前必繼于後乃可以久存而不壞今廢之久而修之難如此則繼是以往惡可以不之慎哉予嘗以使命夜道天津見土石頽圯兵士傳遞者越堞而行若履平地心甚訝之感茲役之獲成也故因諸衛戎官之請為之記

安平鎮減水石壩記

弘治初河徙汴北分為二支其一東下張秋鎮入漕河

與汶水合而北行六年霖雨大溢決其東岸截流徑趨
奪汶以入于海而漕河中竭南北道阻上既命都察院
右副都御史臣劉大夏治厥事復命內官監大監臣李
興平江伯臣陳銳總督山東兵民夫往共治之僉議胥
協疏塞並舉乃於上流西岸疏為月河三里許塞決口
九十餘丈而漕始復通又上則疏賈魯河孫家渡塞荆
隆口黃陵岡築兩長堤歲水南下由徐淮故道又議以
為兩堤綿亘甚遠河或失守必復至張秋為漕河憂乃

相地于舊決之南一里用近世減水壩之制植木為杙
中實執石上為衡木著以厚板又上墁以巨石屈鐵以
鍵之液稔以埴之壩成廣袤皆十五丈又其上甃石為
竇五梁而涂之梁可引纜竇可通水俾水溢則稍殺衝
齧水涸則漕河獲存庶幾役不重費而功可保工既告
畢上更命鎮名為安平遷大夏為左副都御史又命工
部伐石勅內閣臣為文各紀功蹟臣東陽當記茲壩之
成臣竊考之治水之法䟽與塞而已矣塞之說不見於

經中古以降堤堰議起往往亦以為利利與害相值必較多寡以為重輕若毆役土石當水之怒費多而利寡此古人所深戒惟水勢未迫後患尚未形則思豫制以為之備則障之利亦不可誣況茲壩者勢若為障而實疏之顧其疏不至漏障不至激去水之害以成其利暫勞而永逸費雖不能無而用則博矣揆之善溝者水漱之善防者水淫之兩者不亦兼而有之乎易象財成書陳修和君出其令臣宣其力雖小大勞逸不同同是道

也今聖天子勤民思理重餽餉憫流墊宵衣而南顧者
累歲非二三臣之賢其孰克副之當洪之未塞也水勢
衝激深莫可測每一舟至百夫弗能勝則人船俱沒捲
掃築堰垂成輒敗千金之費累日之功卒然失之若未
始有者羣議喧闐皆若棄而弗終改而他圖盖方禦患
不暇而何豫備之有及臣職就工而地靈順軌不逆性
以制物不後天以違時而又從容優裕以圖可久之利
銷未然之患誠事會之不可失者也然則鑒往轍之覆

而思成功之難修廢補罅以期不墜庸詎非有司者之責乎嗚呼天下之事莫患乎可以為而不為彼宦成之急交承之諉遺智餘力而莫為盡未有不貽後日之悔者獨水也哉人無於水監當於民監斯言也亦可以喻大矣唐韋丹築扞江堤實以疏漲詔刻碑紀功著在國史臣不文謹書此為明命復

重建首陽書院記

山西之蒲州舊有首陽書院蓋宋元祐間郡人王昉所

建因山而有名張尚文者實為山長歷元制廢入國朝
至宣德間知州事者改為倉場名跡益泯弘治初元山
陽許侯鵬來知是州既修廟學飭師生示郡治所尚乃
建里社學以教蒙士詢諸士夫得所謂書院者圖興復
之徧閱祠廟撤其非所當祀即其居而重建焉中為堂
曰崇德以施講授後為堂曰養正以藏古今圖籍旁為
左右廡以為肄習之所又後為祠堂三區中以祀夷齊
二賢左祀名宦右祀鄉賢而總名則因其舊越二年告

成於是簡州之少俊得二百人禮聘國子生王紳為之師越四五年漸有成業士之進于州學者視昔有加而侯亦將滿九載矣國子生某某輩謂茲舉不可以無紀北至京師介而請予意懇甚予弗能拒也夫書院之制肇于宋初州縣學之未建也天下之士往往出於其間及學制大行而所謂書院亦未嘗罷前規後隨其效若有盛於州縣者今文教熙洽學校徧天下固無俟乎此顧人才日盛而籍額有定員則養蒙蓄銳以待天下之

用者雖多不厭校諸前代所置小大若殊而作人之意則一而已且凡師所以教士所以學皆以為忠與孝也然必有準則之地而後可以為教必有趨向之塗而後可以為學聖人者百世之師也孟子稱伯夷之風可以廉貧立懦韓子謂微伯夷者亂臣賊子接跡於後世矣故雖其羈遊餓死之鄉流風餘韻在人耳目有不容泯天下之有君親者固於是有警焉而況薰染漸漬出乎其地者哉茲使重生穉子誦簡冊習姓名少而學壯而

行之者迹不必同而風節可以無愧則教與學皆不為虛文也若賢父兄之儀範名守令之惠澤老成雖去而典型尚存者亦獨非登高行遠之一助也哉然則院之有祠其義有所在而禮亦不為無所起也學于是者其亦知所以自勵矣

衡山縣重建文定書院記

衡嶽之陰宋胡文定公之書院在焉歷勝國以來頽圯殆盡而遺址尚存弘治丁巳監察御史鄭君惟桓按視

其地圖所以興復之者會財于官役力于民合計定制中為堂祀公配以少子宏所謂五峰先生者而房廡庖庫之類皆備又掘地得舊祭器若干葺而完之歲春秋修祀事又將聚其鄉之學者居之鄧君請予記按文定公本崇安人哲宗時舉進士為大常博士提舉湖南學事高宗時拜中書舍人以疾求去留兼侍讀專講春秋後以寶文閣學士致仕蓋公初患居當兵衝徙于荆再徙於衡優游十五年以卒五峰以廕補官家居不調晚

辭召命創樓著書者二十餘年視公尤久此書院之所
由建也公之學以尊王賤伯為本安夏攘夷為用當金
彊宋屈之時朝野靡然附和議者為識時論雪恥者為
生事而公引經議政正色直言所以警君心而裨治道
者至矣身既不用其所為傳卓然成一家言至我國朝
遂列諸學宮用諸場屋為不刊之典使公用於一時亦
孰若傳於後之為遠哉若五峰雖未見於用而出處明
決未嘗枉已以干祿深得乎家學之正矣古者鄉先生

沒必祭於社而聖賢道在萬世則天下祀之蓋視其功德小大以為久近有不可得而誣者公今從祀孔子廟庭天子之所親視儒臣之所分祿天下學者之所尊祀也況其所居之地非游宦流寓之可比不特舉而祀之其可哉且及門之士私淑之人如孔氏之有顏孟皆在配享從食之列況公作述之善有若五峰者出而成之徵諸南軒之授受考亭之論議又若是著也而可以無配乎哉書院之作乃古庠序之遺制宋之初學校未立

故盛行於時今雖建學置師徧於天下無俟乎其他而
前賢往蹟風教之所關亦不容廢如茲院者是也夫祭
者學之所有事也而其所為學豈獨筮盛俎簋儀文度
數之間哉衡之學者讀公之書學公之學固將觀羹牆
於廟貌思景行於高山雖欲自畫於道而亦有不
容已者矣湖南之地舂陵則有濂溪嶽麓則有南軒茲院相
距不數百里遺風流澤相望而不絕東陽世家長沙蓋
嘗登嶽麓弔其所謂書院者聞文定之風而有感焉因

為記之以成賢有司之志云

重建嶽麓書院記

東陽昔省墓長沙嘗渡湘江發嶽麓訪宋人所謂書院者得斷碑遺址於榛莽間慨晦翁南軒兩先生之餘風遺澤未有以復也顧有寺存焉耳越二十餘年通判陳君捐俸治材為中門為左右廡甃石數級上為講堂又上為崇道祠以祀兩先生復名之曰嶽麓書院構亭其巔名之曰極高明又買田若干畝以成陳志比王君來

知府事帥僚屬師生行舍菜禮諸所未及如開道路備
器用廣旁舍儲置經史延師領教皆次第舉行而同知
某佐其事蓋茲院自宋初郡守朱洞始建真宗時李允
則請藏書國子監簿周式教授其間乃請賜額遂與應
天白鹿石鼓並稱為四大書院及南渡燬于兵安撫劉
公珙復建孝宗時兩先生實會講焉光宗時晦翁為安
撫更建於茲地學者多至千人田至五十頃廟舍至百
餘間今殿故在遺址廢田為僧卒勢家所據歷三百餘

年而茲院始復其舊於是王君遣使屬記於予亦陳昔所嘗請者也惟古者學校徧天下其教與學者皆聖賢之道故能以一德同俗及世衰政弛道晦不明上擇官以教下擇師以學窮什一之力而後得世之少治而多亂奚惑哉今學有恒制師有定員第玩常惴久不能無望乎什一之外如書院者故士或起於鄉塾則於此為培養之地或籍於郡學則藉游息以廣見聞使斯道之在天下體用一源顯微無間者隨厥窮達皆可為成已

成物之用乃可以言學不然雖學於此猶學於彼無益也且南軒得衡山胡氏言仁之旨觀所為書院記亦惓惓以是為辭晦翁之學固有大於彼然亦資而有之後之學者曾不逮其萬一而不百倍其功惡可哉由南軒以介晦翁又等而上之以希所謂古之人者庶幾為茲院重以為山川之光若其程格條緒則存乎教與學吾於吾大夫士望之矣

梧州府重建廟學記

廣西梧州府倚郭曰蒼梧縣舊各有學成化初僉都御史韓公開置帥閫特新府制遷舊學於府東門外建大成殿于中以府縣二學左右附之規度甚偉而未甚備且門地卑濕為雨潦所困諸公繼帥屢欲修之未暇也比左都御史鄧公總督於茲謂總鎮王公總兵毛公曰學校風化之原也不可以武事廢不可以遐服弛盍相與圖之皆曰如議公乃簡於羣屬暨凡百執事以其意示之皆曰如今於是鳩工度地會具財物卜日興事輦

土為堤周百二十丈高六尺廣三倍之又鑿石以甃其
外又建石為靈星門三造甍為垣為丈百堂有分齋殿
有翼廡祭有庖庫居有房室皆因其故而新之學舊無
樂則募工于南昌倣國學為之又募工於潮範銅為祭
器各若干而學之制始備教授某某輩遣价具書京師
請紀成績以示來世惟古者文武一道然禹定綏服則
分文教武衛而為之制蓋所謂綏服者當夷夏之交文
以治內武以治外雖其勢不可以偏廢而輕重之序有

不容紊者周以六師統於司馬而受成獻馘皆與學行之則文之該乎武可見為政者宜亦知所重矣今之司民社者往往以期會書簿為急置教化於不足為其或有疆場之寄斥堠之警震撼衝擊應接之不暇則其治外非獨不容於不略殆亦有廢而不舉者矣梧之為郡當二廣之衝營陳所集戈馬所聚宜無急乎鉛槧卷冊之間然帷幄之籌兵食之計以至於望助保障之心親上死長之節凡所謂武曹之英士著之舊者皆其所有

事也況其大者或與于科目之選出而為臺諫侍從公卿輔相之臣所以輔德立功參天地贊化育者繇此焉出然則其黌學之方懲勸之法振起磨礪之風不於此始焉亦奚以施哉夫秉彛之性人人所同初不以遠邇疎戚而間惟狃於氣習然後失之學之制所以明道善俗化天下於皇極之歸義蓋如此或者蔑視其地鄙夷其人不屑乎所謂教而姑諉曰緩文而急武詳內而略外則天下之不歸于極不用于世也亦豈特為士者之

賁哉鄧公名廷瓚岳之巴陵人起名進士稱賢守令明
達政體以興學作人爲已任折衝禦侮之務於此蓋有
餘力焉固其爲士者之幸而亦斯地之遭也嗣是以往
安知嶺海之徼無勃然而興以副公之意者哉願爲師
弟子者共勉之姑記其歲月以俟

岼山書院崇經閣記

崇經閣者岼山書院藏書之閣也院在陝之隴州隴人
靜樂閣先生爲教官素喜積書及致事居城西五里許

建靜樂堂藏其書以教學者先生既謝世其子光甫為
吏部考功郎中時欲成父志置所未備書復萬餘卷季
子參甫為監察御史亦積書以並之於是經書子史皆
備光甫以河南參政致事歸乃即堂之故址為書院中
為敦本堂東西為養正復初二齋堂之後斯閣建焉中
設孔子及四配像旁兩壁各置架以庋書而總名曰崇
經者亦張伯玉尊經意也閣之下設七賢像左右為肄
誦之房後為燕室設鄉賢主於中翼以庖庾周為高垣

垣之外為田百餘畝歲收其入以共祀事凡州都之俊秀未籍於庠校者皆聚學其間延師而教之學者日衆參政君乃以書屬其子御史价請記於予予惟聖人之道達於天下固人之所能知能行而乃有不及知與不能行者聖人則著其道於經以明示天下盖有不得已焉天下之人不能皆窮經以明道君人者建學以居之置師以教之若學校所未育儒師所未及教窮鄉僻壤之間遺經舊史亦有不得而闕者賢士大夫又從而贊

相之雖非法制之所必為而亦莫之或禁如茲院茲閣者是已且學之設固存乎師然猶有守令以領其事有憲臣以督其令乃能成才而致用則夫鄉黨之學非有所謂賢士大夫者足以繫衆望而收全功亦奚以建為哉先生往而後皆以易書春秋顯羣子姓學易者尤衆蓋其家學得於經者如此隴之士視此而興焉其大者以文學行業效用于天下而其小者亦不失為親上死長之民庶無負於茲閣之建也是為之記

重建正學書院記

正學書院為道學而作也院在陝之西安蓋宋橫渠張子倡道之地門人呂大鈞輩皆得其傳元魯齋許公來主學事亦多造就後省臣建議為書院合祀橫渠魯齋及其鄉賢楊元甫而聚徒講學其間朝廷賜以經籍給之學田張忠文公養浩實記其事入國朝百餘年遺址為兵民所據而坊名尚存弘治丙辰楊君一清始倡之時巡撫都御史張公敷華巡按御史李君瀚以為業久

不可奪乃屬叅政汪君奎副使馬君龍督府衛別度吉
壤得諸城之正中為秦府隙地秦簡王聞而捐之知府
嚴君永濬議重建焉丁巳汪君進總為布政仰君昇為
按察使請於巡撫許公進巡按張君黼往達觀之貿地
為南門後熊公翀為巡撫馬君碁為巡按並嚴督勸再
易地以益之而其域始廣畫為三區其中為祠左為提
學分司而書院實居其右祠有堂有庖有庫司有前後
堂有左右廡書院之制皆與司稱又左右環為肄業之

室堂之後為會饌之所共為門一重以通出入聖而垣之四周而其制始備是雖僉議積力而張君之克斷嚴君之幹固厥功為多其祠之所祀楊君則以為明道程子嘗為鄆縣簿橫渠之學實得之二程於是主程及張以及於許呂楊以下各以類配是雖復魯齋之舊而實崇祀先賢表章正道以風厲學者非獨為許設也故易其名曰正學書院楊君既被徵為大常少卿以其事告諸東陽請為記夫所謂正學者聖賢之學也其理仁義

禮智信其倫父子兄弟夫婦長幼朋友其用則視聽言
動思其文則易書詩春秋其治則禮樂刑政百凡之務
蘊之於心發之於言見之於事而施之乎民者皆是也
孔子沒楊墨氏各自為學孟子始正人心息邪說其教
盛行遭秦之禍幾乎熄矣漢之學以陰陽唐之學以詞
賦其間若董韓二子號為知道而未純至宋周程張朱
四子者後先繼出而正學始大明於天下故凡志乎聖
人者必以四子為的元入主中國魯齋以聖賢之道自

任而淑諸人其所謂學亦是學也嗚呼文武之道在人
賢者識其大不賢者識其小苟得其正則所入皆足以
進道所就皆足以成功不得其正者弗與也且學古人
者誦其詩讀其書即所居處隨所寄寓皆足以為瞻依
據守之地故國監郡縣學通祀孔子以諸賢配之而大
儒名宦則各祀於其上以其道存焉耳楊君受命分省
任興教作人之寄其督學州郡有成效矣茲又聚徒置
院為養蒙儲俊之計為之標的繩準以示之使趨向有

塗躋攀有等以求至於聖賢之域其教之不厭乎詳如此為之學者尚一志百力朋從而澤麗居必於此而他業不遷學必於此而旁岐不惑則為黌校之良才科場之傑士廟廊藩郡之名臣循吏可計日以俟而古之所謂正學者將暴白於天下無疑矣苟視為美觀文具而莫知所以學則州縣之餘亦安用此為哉東陽既嘉楊君之功慶茲學之行於茲地也故為之記

重建解州鹽池神祠記

曩歲山西按察副使陳君抵予書曰弘治甲寅軍儲闕
賦有司弗能給巡撫都御史張公念惟解池鹽利可取
奏之朝許給三十萬引金時分巡河東實受檄焉時歲
饑民病先發粟賑之始俾就役會大雨水溢公繼至憂
甚劇乃共禱于神翼日近池州縣皆雨而池獨無越十
日鹽乃大給課不勞而數足足之日雨復大至公歸惠
於神因慨其祠宇傾圯復以屬金乃籍其民之居貨取
重利者各出貲為木石費命以官夫佐之始於冬之十

月至明年乙卯之四月而成亦若有神相之者請記其事予惟古之祭法於地之能出財用者則祀之如山林川澤之類是也今天下之地利鹽為大煮海之力菹薪之伐牢盆之制亦勞甚矣而歲課每不給惟解池所出朝取夕獲尤為自然之利此周官所謂鹽鹽韓獻子所謂國之寶者顧其為產必視暘雨燥濕以為豐約雖大鈞之運歸於無朕而土地所在亦必有神焉主之神液陰瀉孕靈富媪柳宗元亦嘗言之矣然所謂神者不必

有形與聲而昭示響答或不可泯則亦存乎人焉耳矣
故曰有其誠則有其神誠於為國為民者神必有以應
之蓋神者民之所賴國之所祀而責望之者也所謂有
其舉之莫之敢廢者其茲祠之類也乎且予所謂存乎
人者亦非特以事神故也蓋必量其貴賤節其賦入如
昔之監司者則公私兼利不求神而自足若所謂豪家
之占奪近地之障愆則神雖有知亦安得而與其力哉
此寶應靈慶之封亦議禮者之所異也予獨嘉張陳之

誠於國與民且徵神之靈也故為記

重建成都府學記

成都府學之重建也實肇於弘治壬子倡其議者布政使鄭君齡提學王君敕柄其事者巡撫梁公璟巡按陳君瑤分董其役者某某而成於今都御史鍾公蕃給其費者為官帑之贏赴其役者為農隙之夫木以章計者九千瓦以片計者五十餘萬青蘆黝堊以斤計者二千石以塊計者二萬餘軌十有一萬油麻膠漆以石計者

百二千銅鐵梭竹布草之類不可殫紀為殿之基其崇丈殿為間七崇六丈有奇深廣稱之增左右廡為五十八殿左右為齋室各一戟門門五間崇三丈靈星門三為泮池橋略與門稱又前建大成坊東西為麟洲鳳藪二坊遷題名記二亭於大門之內以至明倫之堂分教之齋會饌之所名賢之祠倉庾之室皆新之又前為泮池坊市民地二百餘丈增肄業之房為重樓八十間又製為禮樂服器共三百餘事蓋自畿輔近郡之學鮮有

若是比者而遐方僻地弗論也夫自漢文翁守成都至
國朝千餘年而其故址為蜀王府遷今學於西南一里
許又百有餘年而復建焉其間凡閱歷若干代造就若
千人雖道德勲業與時高下而作育之效磋切之益皆
不可誣然則古人建學立教之意其有功於天地萬物
亦厚矣夫所謂教固在於明倫復性樹功立業大者律
之以身小者諭之以言條格品式已為末節有不繁乎
居室之間者顧麗澤以為占居肆以為喻古亦有之不

此之先而徒務乎其大則雖正其模範善其槩襲亦豈可立談而道語之哉且今之為政者必有堂宇以為發號出令之地觀政者尚比之田野之闢道塗之治而況學之為道有專志而倍力者哉諸御史之激揚方伯之旬宣郡守之撫字宜不止乎簿書期會之粗於茲學乎見之矣使司教者及時以明道因地以育才不啻為美觀故事而止則所謂復性樹功者安知不大驗於來學之士哉予故因教授彭偉輩請備述修建之歲月名物

以示後之人俾勿壞

懷麓堂集卷六十五

欽定四庫全書

懷麓堂集卷六十六

明 李東陽 撰

文後稿六

記

進士題名記

國朝殿試之制取會試之選於鄉者策於廷而親第其等謂之進士既板刻為登科錄以傳又刻其名氏於石寘之國學

以示後世是制也在宋之時始不賜黜邇而唐已有之又邇而
晉魏若李秀之科亦或親試又邇而漢則有賢良方正之舉武
帝始賜策試之其所詢者大抵皆治天下之道其文至今傳焉
然不獨是也上自唐虞黎獻之舉數言之奏雖無事乎文而
非治道則莫之言也顧時殊事異不得不求之文字之間而
其為法詳且勞若是亦其勢然爾我朝洪武初置科舉法
既而中輟十七年始復為定制凡殿試讀卷則用翰林及諸
文臣之長提調監試受卷彌封諸務皆各有分職及傳臚

放榜賜宴冠服寶鈔皆各有定期列聖相承莫之或易
今天子嗣統之三年庚戌始展讀卷之期為制加密乃
九年丙辰之試賜朱希周等三百人及第出身有差臣
東陽濫與讀卷又奉勅為記于題名之石臣聞明主勞
於求才而逸於任賢故凡天下事各有所任而不侵其
職若科舉之事鄉試則付之藩臬以為未信也會試則
以名籍付禮部考試付翰林暨於親試則有殿最而無
黜陟蓋以為是可信矣而必親之不以為勞者固求賢

事也夫所謂賢者言足以益乎治則行之行足以稱其
其言則用之今日所求固他日所為任天下事者也於
是禮樂刑罰兵戎錢穀百凡之務皆有所付而享其成
然則今日之事誠惡可苟哉賢者之出將以為天下用
天下事皆能言之若無不可為者及其既用則各以所
得為者為之人各盡其所為則天下之大可不勞而治然
循名而責之其實不能以皆副也夫使行違其言職不
稱任或又舉而隳之則名之著於籍者不過為爵祿之

梯階有司之文具亦非所謂循而責焉者也君之所為
勞者顧若是哉聖天子文德誕敷治化日盛而求賢如
不及忠良碩大足以任天下事成天下治者宜於是出
焉茲石之傳他日必有指其名而稱之者矣若恩榮次
第則求賢之禮固當然者臣不佞謹推本其大者言之

重建諸葛武侯祠堂記

君子之用世必心存乎正則其猷為功業光明俊偉天
下信之後世知之苟所存不正則其所為雖偶合幸中

而疵類罅漏掩匿之不暇縱使欺于一人不能逃千萬人之目誑於一時不能免千萬世之口此諸葛武侯之忠所以通天地貫金石歷今古而猶存也昔侯當漢祚傾危之日雖在畎畝扶顛撥亂已預定乎胸中顧獻帝之身方墮於曹賊之手失國寄命無復有可為之勢而帝胄之賢無出昭烈右者故委身而從之當是時苟可以存漢雖萬乘有不暇顧一劉璋宜無足卹璋固擁兵坐視遣使致敬於賊者也及魏丕篡立昭烈顧命侯益

自奮激佐庸主而不隳其志累蹶累進至於斃而後已
馬是其心終始存沒無一日而不在漢也可謂正矣若
泣廖立死李嚴屈司馬懿而不敢動者豈獨其推彊制
勝之力邪亦生平忠義激發而讐伏之耳彼荀彧者以
溝瀆之經為成仁取義之舉雖幸免於涑水之論而竟
黜於考亭之筆豈非自失其正以貽天下後世之議哉
或不足道也以張留侯之賢報韓復漢世所並稱然究
其心論之亦不免以術濟正未若侯之純乎正也程子

謂侯有王佐之心者其以是夫故後之學者當以武侯為正南陽府城西五里卧龍崗為草廬舊址漢史稱侯躬耕南陽又曰寓居襄陽隆中蓋秦南陽郡即今鄧州而襄陽實在其界故也元建祠祀侯又置書院設山長聚徒講學給田數百頃國初祠燬宣德間知府某某相繼修葺歲以八月二十一日為侯忌辰而致祭焉成化間顏圯過半弘治乙卯河南叅政顧君福分守茲地乃檄諸屬吏鳩工市材復為堂六楹中肖侯像左右廡楹

亦如之其後為亭覆以茅扁以草廬廬之後又為堂六楹曰卧龍祠之左為堂廡各四楹曰書院始事於戊午夏四月成於秋八月又歸其故田四頃以供祀事先是顧君夜夢侯訪之若世所傳畫像者適草廬結構日也夫忠義之在天下人心所同而君好古勤政嚮慕獨至故形諸寤寐如此然則學於此者亦可以監矣君比以書來請記東陽亦慕侯深者故樂為之役云

山西布政司修造記

唐虞建官外有十二牧其命官之辭以民食為重而用人制夷之道具焉蓋兼兵民之寄而畀之也三代相繼雖離合稍殊而責任無改自罷侯置守以來漢唐之州牧刺史建置不常大抵皆以民事兼戎務元立行中書省以應內治其重有加焉國朝於兩畿外置十三布政司分領府州縣以治民事又置都指揮使領衛所以治兵又置按察司以糾察官吏刑兵民之不法者其勢若專而不威然分方之守會官之議雖兵與刑未始有不獲

預者蓋布政之重如此世之昧者或但知為財賦之官而不知為民社之主豈設官之意固然哉顧必有方域以為統會有解舍以為居止有堂宇以為發政出令之地於此闕一焉雖有官為政亦將安所施哉山西布政司建置既久堂解傾仄垣墉頽圯官前後幸代則屢脫以去莫有為置慮者左布政使陳公廉夫始築周垣三百餘丈高丈餘重構官舍百餘間謂之西公解復構五十餘間謂之東公解又為左衙堂室三十餘間又重

建後堂為間五堂東隙地為齋浴之室又修理間所為間十餘前為門二重為廂餘二十之數以及門之外承宣通會二綽楔皆撤而新之自弘治甲寅之春己巳未之秋六年而後成凡為木石瓦甃之費若干萬皆得之區畫不煩於官民之藏凡為陶冶斷築髹綵之工若干萬皆責之於隸役不取諸閭畝之夫行伍之士及其成而觀之則規制宏偉顏采煥耀稱藩會之名號宜吏民之瞻仰信西北一巨麗也惟古之官署制作因草皆託之

文章以紀成事於是乎有廳壁之記有題名之記有修造之記載諸簡牒往往而然山西為國右藩內拱京輔外捍戎狄所繫甚重其修建之舉歲月姓氏名物之實不紀而傳之則後來者安所據以為承繼修葺之地哉雖然利不十者不易業功不百者不變常使無陳公廉直幹固之能節用愛民之惠謀深慮遠之計而任勞舉重苟焉而為之祇見其煩未見其益也世之君子尚思所以監之哉相公之役者若干人觀者按而考之足矣公名青青之益都人也

孫家渡神祠記

弘治壬子都御史劉公大夏既受治河之命實薦河南按察僉事張君鼎之才分厥任焉公躬相原隰下上數百里以張秋鎮之上流為黃陵岡黃陵岡之上流為孫家渡此而不治水勢且不殺功何由成乃督兵民夫七千疏之未幾張秋大決奪汶以入海運河遂壞上命大監李公興平江伯陳公銳往與共事於是劉公分治所謂孫家渡者既又以荆隆等六口皆黃陵上流復以萬

夫塞之功既並舉張秋適塞而運道始復其舊朝廷易鎮名曰安平建二神廟以為之鎮在黃陵者賜名昭應令有司春秋修祀事三公者既以成功皆錄功進祿秩有差而張君遷副使專理運事踰年孫家渡漸壅弗洩奔流橫潰張君慮其復為黃陵害以及安平曰是吾責也其不可復玩丙辰春請於巡撫都御史陳公道以五千人疏之畚鍤雲集卷埽山委檣杙鱗次蓋取治決之餘策遺力而用之六旬而舉自是水勢復通由朱仙鎮

以復項城故道張君復建廟于渡之隄上祀其水神會
某上京師以陳公意告予請為記夫鬼神者二氣之良
能也氣之自二為五生克制化相尋於無窮水之為物
寂微而極盛得其性則利及萬類失其性則害亦隨之
所以翕張變化者神為之也至於巨川大澤淵源之所
匯靈秀之所聚則其神最靈其有能利害福禍人者焯
乎不可誣也然見於此復見於彼隨所寓而無不在如
蘓子所謂掘地得泉者固於水有取焉顧其經畫區處

之方疏滌障塞之力財成輔相之事則神必有待乎人而祝願之誠報饗之禮人亦不能已於神也河之神既列于四瀆分壇而饗專壇而報為天子所有事又有因事特置如所謂昭應之祠者茲渡之祠又派別而支分之亦獨非禮之以義起者哉若其象設之容名號之稱吾則不得而詳也且天下之事功必前後相繼乃能長存而不壞二都憲之志宜乎其同矣使繼張君者玩時怠力不亟修之而徒恃乎神豈務民之義之智哉予喜

張君之義為務民之舉也是用記其事始以告於後之人且系以詩曰河水最大粵有要害或潰於夷或阻於隘潰則漲之阻則淤之雖人之勞神則將之有岡在原有渡其上載疏載堙復決其障厥性既安岐為兩流曷鎮其衝中有崇丘厥功告成乃秋神祀為此祠者維有司事宮牆麗空象設在中秋菊春蘭暮鼓晨鐘神之至喜簸浪掀風神之歸與水與天通願河之平神亦寧止中臺有丞外臺有貳功昭無窮祀亦終始其或怠事有

如此水

重修宿松縣廟學記

學舊在縣治東南百武許僻隘圯剝為流潦所壞弘治乙卯冬朱公巡撫南畿顧而歎曰是不可以不治乃檄縣重建發公帑銀五百餘兩工未半朱子告歸彭君禮繼之曰是不可以不卒則督府以下亟修厥事念其用猶弗給募富民以私財助之雖而至者道相屬總之得若干緡會連至月校而事程之而知府張君冕又躬定

條約以授於溥徙廟就高中為大成殿重檐廣霑廉陛
縣絕旁為左右廡廡盡則環屬於謁聖二門而中為戟
門前峙又左右峙為祇肅二門及集禧之室又環而屬
之櫺星門而止皆棟宇森聳象設魏煥於是廟制有加
于舊廟之西為明倫堂高遜殿數尺而敞不減旁為進
德修業二齋少殺其三之二而坐立進退之間綽然而
有餘東為奎星樓以庋經籍其高略與殿等下為師生
康饌之地又旁為號舍若干以居講習而學之制亦有

加焉教諭某訓導某某相與議曰是而不記不可也乃
寓書屬介以請于予予惟君子之學必以時而其成則
有其序自秉彝之性梏於形氣之私舊染汙俗不容以
不亟去此易所謂欲及時者也所謂不遠復者也及其
崇德廣業則非一蹴所能至博學以聚之集義以生之
真積實踐而使之不移優游涵泳以俟其自化蓋久而
後成焉孔孟所謂譬如為山不成章不達者也學而至
于成則由體達用推已而及之人惟所之而無不當矣

故為學而失其時則病於悞進而不以其序則病於躐
二者有一焉其學之成者吾弗信也盡觀於茲役乎敝
于數十年而修之一旦可謂得其時更于數人積數千
萬工而後畢其序固若是也觀于是而為學之道得矣
苟居于斯萃于斯若傳舍塗路或悞或躐而不知致力
之地則欲成其身且弗能何以推而達之用哉夫學之
設有司所以教乎人者也修之若是其亟成之若是其
難而士之學不成或成而弗濟於用亦何所益而為之

也宿松之士其亦知所勉哉其亦副諸大夫作人興教之意哉因書以為勸

重修季子廟記

常州府季子廟在府治東一里刑部尚書白公昂嘗讀書其間慨其敝陋謂居守道徒曰吾他日必修之公舉天順丁丑進士歷官兩京不暇葺治每詢諸子弟及鄉之人聞其益敝恒慨然於懷越四十餘年為弘治戊午始以屬諸巡按御史曰此有司祀典所載第公賦方殷

未易旁及乃會諸官得贏財若干簡材治籍庀物督工
撤其舊構而重新之堂廡庭祀以次繼作屹然為隆煥
然為華象設昭布禮器具列回視昔之頽垣敗宇者異
矣按吳封於延陵實今之武進縣縣西七十里暨陽鄉
有季子廟後其地屬於江陰孔子所書石刻在焉唐玄
宗時命殷仲容摹刻之代宗時潤州刺史蕭宗宋徽宗
時知常州朱彥述傳刻之國朝洪武間始毀其後修之
又摹舊刻置於庭側自季子沒二千餘年廟幾興廢幾

遷徙而其名號風節固未泯也夫稱季子者謂其執節
讓國不以千乘動其心聘魯觀樂而知列固之故聘齊
鄭衛晉而知其政見其臣而知其所可與者其明睿通
博出於人遠甚故以孔子之聖與其合禮至題辭以表
之非其人之賢宜不得比議季子者乃以來聘書名之
義疑其讓國之過為賢者累殆亦有說焉然春秋所書
其隱然者也禮之所載與墓題之所識其顯然者也隱
然者既未能以盡識顯然者不據而信之奚可哉夫讓

德之美也苟知讓之為美德則於處家必無秦越人相視之患於羣居必無觸蠻氏交戰之恥茲廟之祀固庶貪立懦之端其於世教不為無助也東彝好德人心所同況私淑景仰出乎其地者哉白公壯而用世老能完名慕古力學蓋其素志而於好德審尚之義亦有合焉茲廟之修若有待於今日不可以不識也東陽楚人雖殊地異境亦有感乎斯義因紀成事告諸來者俾時修之且為楚歌以祀神其辭曰朝弭節兮江東暮褰芳兮

水中遲公子兮不來鬱余懷兮忡忡蘭堂兮桂宮檐
兮數重兮子兮歸來樂予心兮融融吳之國兮姬之宗
紛伯仲兮讓侯封彼美兮公子纘太伯兮遺風時震撼
兮春撞鬪雄雌兮競衡從屹砥柱兮不動見東流兮淙
淙眇千乘兮一毫亦何心兮鼎鍾生好古兮若渴匪斯
人兮曷從神之居兮俗龐神之錫兮年豐願千秋兮百
世永報祀兮無終窮

重建茶陵州學記

茶陵在宋元為州州有學燬於兵燹洪武間始降州為縣建學於縣西郭外成化間復升縣為州知州俞君蓋遷學於州治西偏弘治間李君永珍復遷郭外學屢遷而科目士愈疎閤弗繼丙辰之歲董君豫來知州事考諸圖籍知宋元舊學在城西南二里其地曰獅子口與茶陵衛指揮王侯廷爵往相遺蹟半沒於民家於是白其事於長沙知府王君瑀又白之湖廣布政參議夏公昂按察僉事湯公全又白之巡撫都御史沈公暉巡按

御史曾君昂既報許且檄府通判李君某暨董其事則以隙地易諸舊主又募州衛諸義民多效財力籍諸佃作得千數百人乃役之除其舊基果得斷階敗礎於下蓋其岡脈自雲陽山而來洶湧奔放結為是區左右山水交拱環抱不見其際信吾州勝地也顧舊學堂殿皆狹隘移其故材拓而新之規制闔敞輪奐輝麗亦加於昔經始於丁巳十二月迨戊午七月告成自入國朝百有餘年而州始復其名又二十餘年而學始復其地殆

亦非偶然者矣予聞而嘆曰人稟天地之性以生其善
同也或為氣質所限又移於習俗之偏則不能以不異
惟學者能變其氣質愚可使明柔可使強苟明而強則
其性無弗復者矣及得位以行政教則能變其習俗齊
可以至魯魯可以至道苟至於道則人之性無弗復者
矣若不克變而徒致力於事物土地之間以求之奚益
哉吾州文獻地其在前朝登巍科躋臚仕樹功立業者
相望也既久而不振豈非學與教之責哉今復而州名

復而學地亦振起作厲之機而明彞倫正風化之義固
於是乎在士之學於是者必澡志潔慮擇善而力行使
德崇業廣足以濟一世利萬物則非獨為一時一鄉之
士而稱為天下之英才千古之豪傑可也使徒挾名邦
矜勝地而不知所以學非徒無益又適以損之固非賢
有司教士之心亦豈吾士之所以自處者哉予因學正
江海章及諸鄉士之請特紀成績以告後人且以期復
古之效不止乎宋元之盛而已

重建深州廟學記

弘治戊午夏四月深州知州郭君騫重建廟學始修大成殿六楹增築靈臺十有二丈次建左右廡各增為十楹廟之東為省牲所為神庫各四楹前為靈星門亦如之內門則增其楹二又次為明倫堂為後堂又次為左右三齋楹各四旁為肄業之房楹四十餘為東西倉共十二楹又於學之西為亭於射圃如堂之數自臺廡以下皆出新構不因於舊越明年己未秋八月既望告成

相與議曰學廢之久而成之若是難苟無以識之安保其不復廢於是以記請予予為之言曰道人之所同也惟聖人能盡且以為教故君子舉而歸之學聖人者賴所為教以復其性而報本反始之義生焉故建學者必有廟廟與學兼置而後得其所為學者聖人之道萬世不廢則所謂廟與學亦將至於無窮焉然後之學者或不知所為學其所致力不過口耳皮膚之間甚者徒為之美觀文具而無所事學故并其所當祀者失之若所

為祀亦止乎象設禮器聲容文物之末而不能祀者又弗論也今廟學遍天下而圯壞過半為有司者勤勤汲汲蚤作而夜思非錢穀之出入則獄訟之曲直錢穀獄訟亦豈非道之所有事者乎其本不專在是也於是知職教化者不可不於此焉盡也深州畿輔地去京師不數百里衣冠禮樂得於教者宜先士之漸染聖道非遐陬僻地比賢有司又從而輔翼之指其向方而示其本始茲學之修固立教興化之端也苟徒囿於壤地宮

室之中由之而不知習矣而不察或不知之艱而行之艱亦惡貴乎修建為哉羣進曰先生之言非獨可以紀歲月亦足以資毀學矣因復諸儒師俾刻之石以為記

金華府鄉賢祠記

金華府鄉賢祠浙江布政參議吳君紀所建也府舊多賢宋宗忠簡梅節愍潘然成三公祀於學宮東萊呂成公祀於麗澤書院元以何玉祀於四賢書院皆燬於火國朝成化初按察僉事辛君訪請立正學祠以祀東萊

四賢而諸賢皆未及祀吳君稽古問俗慨其遺闕乃取舊所傳敬鄉錄賢達傳及諸史籍擇其德業文藝之卓然者分為五類合五十二人相地得廢寺於城南隅構祠堂一區名之曰鄉賢祠經始於弘治丙辰之冬而成於丁巳之秋歲春秋帥寮屬生徒修祀事又志諸名賢姓爵諡事行述作之暨各著義例以見其所為祭者其用心亦勤矣古者功宗之秩蓋取人臣之施法定國禦災捍患者祀於國而鄉先生則祭於社夫所謂鄉先生

者不必皆仕於時用於天下而其言與行足以範世厲俗雖謂之法施於民可也韓子謂句龍棄以功孔子以德故徧祀於天下然則德之及於鄉者比功於社各於其鄉祔而祭之豈禮之所得已者乎社之祭固有民者所同鄉賢之祀亦視其地之有無而已無德而祀者謂之淫有德而不祀者謂之闕淫與闕皆不可以為禮是一鄉之祀固不容已而亦奚容以苟乎哉今所謂大儒者惟以明道為尚而無取乎詞章訓詁之能所謂名臣

必功德及人而不徒取乎爵位之顯所謂忠孝寧以敢
諫比死節而事之不繫安危者不與至若錄孝子而抑
過中錄名儒而黜失行其選不可謂不嚴東萊已從祀
孔庭固不俟論若諸賢者雖一鄉之評而亦天下之公
論也彼生於斯學於斯聞其姓名覩其廟貌知其非苟
祀者仰慕效法之心其能已於俎簋尸祝之間哉故予
謂是祠得祭義而志得史法一舉而二善備矣志有前
後序而予以參議君之請為記序由志以及祠記則由

祠以及志故各舉其重云

三錫堂記

廬州府治有堂曰三錫知府馬汝礪燕居之所也初汝礪以成化甲辰進士歷官刑部員外郎弘治癸丑左遷于廬為通判越三年丙辰遷同知又三年己未始擢知府間憶宋陳堯佐三守廬州名其堂曰三至今不離郡治而三沐錫命因倣其意略為異同而茲堂名焉且是歲孟春汝礪之父良佐公以戊戌進士累官南京翰林

侍讀學士方被詰命進階奉直大夫其母加封為宜人
祖父母皆加贈如其父母其弟倫以季春復舉進士而
汝礪之擢則在仲春之月雖以是稱三錫無不合者蓋
汝礪世學易故取諸王三錫命之義云爾夫人臣之錫
於君者曰科第曰爵秩曰封贈顧非文學之中選才行
之應格階資之合典式則不得與三者有一焉猶足以
為難若萃於一門集於一時者實奇事嘉會非可以理
執而勢料也汝礪之在廬旌於當事者累數皆以為勤

慎豈弟有良吏風故資累望積愈升而愈進若其父子
相授受昆弟相師友舊恩疊至而新寵益加淵源之深
長模範之真正蓋亦有由然者矣以川蜀之僻遠西克
之簡朴而得之豈不誠難乎哉然則名堂紀實比之於
陳氏之盛以附鄉邦故事亦惡乎不可也抑觀堯佐之
父省華雖未甚顯而封秩特隆史稱其家教嚴肅不以貴
富廢禮法今學士公方以文行嚮用無俟其子之貴而汝
礪輩又踵而成之使其策勵增益久而不懈以益致乎爵

秩封贈之盛寧不為茲堂之光也哉故不可以已於記

留耕軒記

少詹事兼學士新都楊君介夫嘗言其父留耕先生所
居有軒焉乃其所取以自號者也先生蚤從父宦貴州
有陟岵之變奉母大孺人間闕歸其鄉貧不能具脩贄
以從外傳惟舊藏周易一部手自披誦遂以取鄉舉居
京師弟子數十人及舉進士授行人司正擢湖廣按察
司僉事專督學政其所造就躋華要者甚衆而先生亟

致其事以去其教子亦以易學介夫之舉進士實先生諸子廷儀亦繼舉廷平廷宣又連舉於鄉一門科第之盛莫之或過比廷儀為兵部主事考最當封先生以品高例得進階給誥命命未給而介夫遷今秩復以兩宮尊號恩封公且從高者改給如其官則異數也方先生之就學固未嘗自必於顯庸盛大如今日而大孺人獨心期之以為祖父之澤留以遺後人者固在而先生式克成之又將以遺其子若孫此軒之所以名也凡祖

父之於子孫必有所遺德則欲其修業則望其成自陰
啟豫養之餘以至於庭趨面命之際皆是也是雖不可
以喻度遐卜而實其身自為之譬之田焉秋之所獲即
其春之所耕者也經有之厥父菑厥子乃弗肯播矧肯
獲史不云十歲種之以樹百歲來之以德近世賦詠有
方寸留耕之說其亦本諸此乎楊氏之先積義累仁而
弗究於用於先生焉發之碩德懿行力自植立內以教
其子而外以淑其諸生雖晚達早退而榮封顯錫駢臻

疊至可謂播而獲矣介夫當先生授徒時方及齒聆誦
讀聲即闇記若素業者入翰林博涉經史用以供講筵
史局之職敷衍明暢纂述精當才望揭揭在人耳目廷
儀亦表出郎署而來者尚未艾則先生所以為後遺也
又豈可以丈尺斗斛計哉世之不種而獲者殆有其人
然非天下之恒理君子所不謂聞先生之名亦可以勸
矣族祖雲陽先生嘗作方寸地說予讀而識之茲於先
生有感焉弘治乙丑先生壽七十介夫居禁密且有日

講之命不克躬奉觴筯請記名軒之義為先生壽適廷儀以奉使歸因函而致之以揭諸軒中其亦先生之意也夫


松巖記

夫松植物之壽者也魯論歎其後凋戴記稱其不易歷歲月經冰雪殿草木而孤存者其恒也然或不幸而生於通衢坦地不出為梁棟器用則為人之所薪其獲保質完節終乎天年者亦鮮矣惟深山重巖之中人跡之

所不能及斤斧之所不得加其生焉者乃可以終其年而不夭視諸羣卉衆木或以月或以歲或倍焉或徙焉而皆莫之及於是松之壽始見是物之壽者固存乎質亦未始不繫乎其地也歛地多巖谷其產宜松輪囷盤虬動數百年有可望而不可挹者孫封君有容顧而樂之曰吾將於是比德焉蓋自棄舉業以來一遊吳越再遊金陵興極志倦歸其鄉而不復出及其子忠顯為大理評事獲沾錫典雖有名秩命服自處與韋布無異徜徉

容與於所謂松巖者因取以自號人之尊禮而不敢字者亦以是稱之予聞君敦孝彊義動多利濟傾困庾治橋道費數千百計其三世祖嘗以贅冒程姓程為歛望大夫士爭附託之而君命其子請復孫姓必遂乃已其知本務實不墮流俗尤人所難是宜其培積深厚饗有優裕膺壽考於方隆質其所自喻無愧也君既教忠顯舉進士累官右寺副守身效績足徵家訓仲子忠弼為郡庠生季子忠振及諸孫皆就學而君之壽猶足以待

之則所以培其身以及其後人者又可知也君壽躋七十誕辰在九月之末忠顯方奉命錄刑兩浙期以竣事過家稱慶念禮部之試見知於予請記松巖之義以寓頌祝期且至走价京師俟於門者再閱月予弗能置也詩人祝壽者不云如松柏之茂請并以致意云



懷麓堂集卷六十六

欽定四庫全書

集部

懷麓堂集卷六十九

詳校官監察御史臣范衷

中書臣劉源溥覆勘

總校官編修臣王燕緒

校對官待詔臣

胡士震

謄錄監生臣

劉淡

欽定四庫全書

懷麓堂集卷六十七

明 李東陽 撰

文後稿七

記

新修平陽府城記

平陽城國朝洪武二年都督馮公某所建也歷百有餘
年日益圯廢都察院右僉都御史魏公紳詢於布按二

司曰是不可不修也於是檄知府杜君忠領厥事通判王鐸身董治之會物為費計直受餽丈累尺積刻日而卒肇工於庚申之春迄辛酉之冬而成凡為城四面周袤二十里面各一門門各為樓一四隅樓亦各一而差小門又各為二廂共五十有六楹為鋪舍九十有六門之馬道八十有九丈城之上有垣為丈五百九十有六惟東一面則衛指揮張璿錢清所修而鐸之功實居其三皆因舊為新增卑為崇拓隘為闊土石山積畚鍤雲

布及其成而觀之嶄然而高截乎其方堅厚嚴縝卓為
巨麗回視曩昔若未始有者而吏忘其勤民不知勞君
子謂是役者役之善者也按漢郡國志河東平陽實堯
之都晉地道記云堯城在焉說文括地志又稱陶丘濮
州皆有堯城去古既遠未知孰是而平陽之說為近然
戰守版築之事二典所不書而茅茨土階見諸傳記則
雖宮闕有所不暇於城何有博物志以城為禹所作平
成之後武衛之奮理或有之堯之地或以都邑故名之

曰城亦未可知也世殊勢異不得已於外攘設險守國之義至周大備散見於易詩春秋禮記之間者不絕以為不如是不足以為國也論者乃謂在德不在險故城郭不修猶以為非國之災然則恃此以為治者亦末矣今天下藩府類多城郭而西北尤備平陽披山帶河背負關陝戎衛所在餽運所集城之制尤所不可闕為有司者遭際承平狃於無事坐視廢墜不加之意而顧以勞民為解或不能說以使民而以無益之事勞之其視

此豈不遠哉於此見巡撫之善令藩憲之美政良有司
之各舉其職也且平陽之民舊稱勤儉服勞溫恭克讓
有堯之遺風推是以往富而教之則凡利用厚生之功
親上死長之效將無不至不止乎守內攘外之具已惟
天下之事難成而易壞事事而舉時時而繼然後可以
言治是役之難亦豈非後來者之責哉通判君以書來
請紀歲月因具述其事如此

重修尼山宣聖廟記

尼山在今兗州之鄒縣去曲阜闕里宣聖廟六十餘里
峙為五峯其中峯則宣聖所取以為字與名者也五代
周顯德間魯守趙某始建聖廟宋慶厯間文宣公宗愿
修而復廢元至順間衍聖公思晦請復之後至元間乃
建廟置書院季世兵燬無復存者國朝永樂戊戌衍聖
公彥縉以私財修之歲久皆壞弘治己未今衍聖公弘
泰復議修之巡撫右副都御史何公鑑曰此有司之事
吾徒之責也乃以屬知府龔君弘會財庀工規畫綜治

既精既密廓大成殿為間五為寢殿亦如之增啟聖王
後殿修泗水侯沂國公及毓聖侯諸殿又增書院為後
堂及左右廡其為間各若干以及庖庫亭井之類皆脩
凡為殿與院各為門垣以相限別而為大門一以通出
入總名之曰尼山宣聖廟者從其重也竊惟天地之氣
絪縕變化為人為物天主生地土成時運歲月屬乎天
山川土壤麗乎地時與地各異而所以為人物者不同
人得氣之靈聖人又得其最靈者故於時與地皆不可

以常得由堯舜至於湯由湯至於文王皆五百有餘歲而後一見又自文王至於宣聖亦然夫以二帝三王間世迭出道之廢也旋相為興及周以後天將憫聖治之不復見也宣聖之生於此固宜吾宣聖者雖不得位然修道立教以貽萬世乃古帝王之所不及是固元氣蘊結之深且久亦獨非鍾萃孕育之厚有以致之然乎魯以周公所封遺風善教為諸國望其山之大者為岱宗尼山者岱之支而秀者也宣聖之出於此亦宜然則願

氏之禱載諸史傳徵諸名字蓋亦有之而非待此而生也宣聖之道徧天下及後世故凡衣被光澤者皆祀而報之上自朝廷下至州縣著為恒典而闕里林廟則以嗣衍聖公主其事尼山之廟以二月為生辰九月為忌日一歲再祭而山之神亦附祭焉夫魂氣之飛揚固非體魄歸復之比然因生邇原報本反始之舉有之而不敢廢茲廟之制誠不可以或弛也為孔氏後者觀聖人之音容而不可得則求之廟庭廟庭而不得則求之林墓

林墓而不得則又於茲山茲廟求之仰止景行念爾聿
修之意可以油然而生矣聖澤所底不愈遠而無窮哉
況天下之學者仕者或游或寓之此而求焉其為益不
亦大且博哉若謂聖人之道無所不有聖人之神亦無
所不在有不專乎此者則論其理之凡而非所以論祭
之義也東陽之女實歸於今公之從子聞韶故公以廟
事屬為記以告後之莅茲土者

修建易州學記

易州學之敝久矣弘治戊午新安戴侯敏來知州事始
修建焉蓋自下車以來觀於學之西南隅有道觀屹然
而峙勢若相掩乃起而歎曰吾不能而彼能之何心哉
會風雨大作廟之椽瓦益壞不可支監察御史陳君玉
提學畿郡以興教作人為已任檄諸有司嚴飭學舍侯
意益決又值歲旱重煩民力取官之贏財而不足於是
州之老長偕大夫士之家居者爭輦巨木助之肇工於
庚申春三月聚粟於學召窶民數百輩食而傭之趨者

踵接既而邊報沓至軍需甚亟侯應答之暇不忘茲役
迨秋九月而成其為制則遷舊廟於學堂之左為楹數
倍高廣稱之東西廡為間三十六戟門之為間三外為
泮池旁翼以庖庫南為櫺星門若堂若齋及講室饌舍
射圃諸制皆因舊為新宏敞壯麗恒制所不及約其費
若不貲而綜理規畫各中其會故不勞而事集其速且
大如此也嗟乎孔子稱性近而習遠自非上智未有不
成於習者其所謂習又有時與地之異必久而後成焉

易州在古為慷慨悲歌之地歷漢及唐不過弓矢甲冑
之區石晉以後羣雄遞興輾轉竊據而淪在邊徼旋亦
失之我國朝地在甸服王化所先被漸涵浸漬百有餘
年世仁之澤不止乎勝殘去殺而已故章縫衿佩之士
誦詩書而服禮義者彬彬其盛習之善於此固可徵也
顧法久則玩學久則荒提撕警厲以成其習者必資乎
教而所謂教必以明倫復性為本而誘掖導示之方禁
治防遏之制皆不可闕然非有地以施之則亦無所用

其力者茲役也獨非良有司施教變習之地哉士之生
得其時又得其地又得良有司者起而治之其不力去
汙染勉加修治求成其習復其性以為天下用則誰之
責也世之為教者每患於學之不成為學者則諉於教
之未至予於茲役蓋嘉有司之賢而不能不厚望於士
也某某上京師介州人請予記於是乎書

楚觀樓記

武昌譙樓在楚王府後布政司前數十武黃鵠山之上

宋元以來故址尚在負陰面陽得地之勝國朝洪武初
既建以藩議弗協未久而廢厯百餘年莫有復者弘治
己未布政使徐公源朱公瓚謂鐘鼓無節則無以警衆
出令乃請於今王國復其舊規制甚偉及徐公擢去今
布政韓公鎬踵而成之撫按諸君實主其議知府某君
某以下董其役會工命徒不亟不徐越三年辛酉某月
而畢鼗鼓既設厥聲孔揚晨昏蚤暮之候出入作息之
節若令於一人會於一庭凭闌而眺南則武昌諸山左

右環列藩府雄峙屢闔分布北則大江西來沃野長袤
殿庭宮宇隱約於遙空遠漢間韓公乃名其樓曰楚觀
落成而燕客有在坐者舉觴而問曰樓之作凡為鼓設
也軍法以金鼓為耳旌旗為目彼鐘與鼓者皆耳之事
也而以觀名無乃弗類乎公曰古之樓以譙名者取譙
曉之義以其高也後乃寘鐘鼓以為警備然其為制則
非特尚耳而目之義存焉蓋耳目之所在必虛空洞徹
四達不蔽而後能發使凡卑湫隘之區阨塞掩蔽之處

則雖鑿鑿鏜鏜日相尋而不絕其有聞焉者寡矣唐虞
所謂明目達聰二者蓋不可以偏廢故自漢京置鼓於
樓以脩警盜齊之李崇宋之張希顏皆以善政載在國
史唐之李磎韋慶復為樓著記詞場文苑亦侈言之逮
今後世自京師以達於天下未有能廢焉者也且鼓之
為器本樂之類也顧名同而用異用之樓者非直以節
出入關內外所以號令政事皆於此乎助斯樓也固政
之不可闕者乎今夫連山大江曠野空谷禽魚草樹風

雲月霧百凡之形狀不出几席而得之目睫固荆楚之大觀也聲之發於此者必能超塵濫而出烟霄凡有耳者皆得之以為提撕振厲之地蓋一舉而二義闡焉若任耳而棄目非吾輩之所為計也客乃領之而去退而詢諸湖之人皆稱韓公為政勤外精內博觀而廣聽蓋欲振一方之治以紓九重南顧之憂因指斯樓而謂曰此其一事也客上京師謂予亦湖人則以告予予舊與韓公同朝方喜其為父兄宗族之福因憶曩時經過而

未有見者壯公所為記所由始寓而歸之俾近者刻之
堅珉寘之樓以告後來若布政按察諸公皆能贊相先
後以成嘉績而撫按之風裁并於是徵焉若府縣羣屬
有事於斯役者彙而書之碑後

景州廟學重修記

監察御史陳君玉督學北畿檄諸郡縣以興教育才為
事乃至廟學僻舍罔不注意比為予道馬景州馭之賢
而及其廟學之勝既而景州訓導率其諸生以公務上

京師出所為圖請紀其事於石蓋景為河間要地舊有
學學有廟歲久敝陋存不過十二弘治丙辰馬君始知
是州圖新其故顧公帑匱竭無能為計養民畜財三年
而有成效曰可矣乃會材僦工拓地紮址構大成殿八楹
左右廡各二十有一楹前為戟門門之東為神厨神庫
為宰牲之所其楹各四西為致齋之所其楹八又前為
櫺星之門門東西為綽楔四又前為屏牆數丈以障行
者總之屋以間計者七十有四焉廟之東為學門轉而

西至殿之後為泮池池有橋橋之後為堂曰泮宮其楹
四又後為明倫之堂又為後堂楹皆如殿之數而差小
堂之左右為肄業之齋會饌之堂楹皆如泮堂後堂之
左右為號舍楹各視廡之半環而南為東西倉楹皆如
齋之一又以其後之隙地為僻宇視號舍之楹幾倍學
之東隙為射圃圃有亭曰觀德之亭楹亦如齋而差廣
屋以間計者一百一十有七焉夫自唐虞設官以教胄
子而天下化之學校之法至周乃備其間羣聖人者皆

以其道為治為教治衰則教亦隨之羣聖之道至孔子而明故天下舉其道而歸之孔子凡所為學皆孔子之道也因其道而報本反始於是祭之義生焉道在萬世則萬世祀之天下之學者不得徧祀羣聖而得祀孔子以及於萬世者其教存焉耳故學之有廟雖不待於禁令而莫之敢闕豈非秉彝好德之心無以異哉且祭起於學而所謂祭者亦學之所有事故自觀乎萃聚以至於升降作止之節必學而後能由是而推之生三事一

之義則定省甘旨以事其親冠裳職位以事乎君者皆
於此焉得而況養志循理之孝致命盡節之忠又其所
恃以為本者乎孔子亦謂郊禘之禮可以治國蓋以此
也若徒日誦月課以為功高拱長揖以為禮則為學之
末務後世之通弊豈獨於祭然哉而況并此而失之者
哉方今聖天子謁廟視學以孔子之道治天下而天下
之賢有司者皆勉承之不急畿郡之地教澤之所深被
如是州者宜有所感發振厲以成真才著實用不徒為

觀美之具於此也願諸士子相與成之因次第其始末
以為記

植本堂記

慈谿姚氏有堂曰植本堂蓋自宋郡守嗣宗居越之雲
樓四傳有曰榛者為鄉隱君子始遷慈谿構室於聯桂
坊之右以居而斯堂作焉為是名者以示祖德垂世訓
也又十有八傳而其堂猶存歷元至國朝前後閱百數
十年而甲第簪紱之華不絕登斯堂而姚氏之文獻可

識也夫物以植名者必其本深而後末茂凡天下之植
皆然矧人乎哉夫人本乎祖者又必植德樹業而後可
傳父以傳之子子以傳之孫士有恒學農工商有定業
各視其所植以有成為子孫者能保其所植而不廢蓋
亦鮮矣若越世出類不待植而自發者幾人哉姚氏以
文學發於累代圖史之具絃誦之業自髫髻至於頌白
少者壯壯者老其所研究而礱習之者皆是物也用是
取科第登官籍若灌而茂稼而穫然固子孫之盛且賢

而其始之植之者亦惡可忘哉故登斯堂而文獻之所
自出者可邇而見也古者以堂構喻家國蓋徵諸一再
世之間已以為難況歷若干年而所謂堂者固存即其
小可以徵其大然則姚氏之所當保者不獨斯堂而堂
也亦其一也故以次第其世系官職及名堂之義為記

山行記

弘治癸亥冬十月予有事於申邸之園園在都城西五
十里蘭山之麓丙申朏晨出郭沿官河北堤並西湖至

甕山圓靜寺憶昔所登晶菴者停肩輿緣石磴而上則
有平甃新構屋前後櫛比層波遠樹平田曠野已不復
見慨然感之乃遽去轉湖西入功德寺寺蓋宣德間所
建甚弘敞後殿尤極精麗殿柱及藏經笥皆錐金錐金
者布金於地髹綵其上以錐畫之為人物花鳥狀若繪
畫然又有刻絲觀音一軸懸於梁際刻絲者以絲刻為
畫非繡非織別為一法殿後有毘盧閣閣兩簷八角高
七八丈而已時予堦衍聖公孔聞韶知德間予茲行乃

與偕南至玉泉亭宣廟所駐蹕處泉寒不可飲勺而翫
之又至華嚴寺寺有洞五其下洞鑿為方室深可二三
丈東壁有元耶律楚材詩刻尚存緣崖上數折徑僅容
足約半里許至絕頂乃昔與楊都憲應寧所登有一僧
結草為衣出洞揖客其西壁有予所題詩已為人滌去
予笑曰吾詩固非紗籠中物也因憶予嘗數游實不知
有上洞吾子兆先時為童從予游忽自上趨下云更有
佳處自是始知之而今不可作默然自傷者久之諸君

不識也旋降至下洞欲往香山日已昃知德輩還宿功德予獨嚮西南可十五里厯重岡入杏子口至善應寺宿焉丁酉擬登平坡山雨不絕僕隸皆畏莫敢進予決策徑往出門而霽乘輿入雲霧左右顧澗水深不可測數折始及寺寺乃元故刹宣德間修之改名圓通斬石為址凡為殿五層最上有小殿極峻險前俯巨壑無涯際僧言每日霽則見都城九門三殿皆隱隱可識真一方奇觀予昔所未到蓋為羣議所尼為之一快寺距申

園不數里既竣事日復昃不可歸乃循翠微山而北求所謂香山者再失道抵暮始至則知德輩已在若相迓然因共宿永安寺來青軒軒居山半俯瞰巖樹色青黃相雜僧曰山中授衣候惟視此耳戊戌徧觀寺宇中鑿石為磴數十級級僅容跬勢甚峻予憶嘗徑陟下且半進退不可幾若韓昌黎華山絕陁狀乃巡廊而上見其殿閣宗麗與平坡并峙出自北門緣厓二里許至洪光寺地益峻上有碑稱成化間太監鄭同所建凡費銀七

十萬兩因詢知香山為正統間太監范弘所建視此尤
倍其費當益多然不可紀也降而東北十餘里由華嚴
山後經諸公主園入金山口復過功德不入折而北西
登妙應寺凭欄望湖水如圓靜舊址而空闊過之東北
行二十餘里又北至靜虛觀登土山山可百步高四三
丈有樹數百風簌簌有聲髮盡豎不可久駐亟降至畏
吾村墓舍少憩而還比抵家日又晡矣噫漢之五陵唐
之曲江皆神州名勝地詞人墨客動侈言之西山為本

朝勝概予實京產顧限於官守不得時至自備員臺閣
以來如茲遊者僅一見而已孤登獨眺固不若羣遊衆
樂之為懽舞雩童冠非仕者所有事信宿之際為興已
不齊則是行也誠不可以不紀詩五言十首彙錄於後
共為卷

重建福州府學孔子廟記

本朝孔子廟徧天下然不特設設必於學蓋自國學以
至於州縣皆然若隆替舉廢則存其人視其所為政而

莫有同者焉福州府學舊有廟在學宮之西洪武初改僧寺為之制頗隘監察御史衛輝陳君王來按其地既廟謁帥師生環而瞻之曰是不可以不治乃謀於布按下府若縣發公帑聚財物命工役伐木鑿石治鐵陶瓦卜而將事殿以間計者增五之二廣以丈計者增十之二崇增六之一廡為間各十有一闕而廣之遷其所謂學舍者戟門櫺星門崇廣皆有加易神厨於泮宮門之東其南為書樓以貯舊籍別置鄉賢名宦祠於戟門之

外以其地為庫貯俎豆金石諸器又累甃為垣覆以瓦
墁以赤埴表裏鉅細秋毫非故物也於是庶陛高聳周
阿嚴峻髹采煥發蔚為偉觀凡用金以兩計為二千八
百工以日計為二萬一千而時以月計者九自壬戌之
七月至癸亥之四月朔之七日釋奠於先聖而告成焉
教諭某某輩曰是不可以不紀乃具書遣使以請於予
夫孔子之道在人心無遠近古今之間故自家國達於
天下無所往而不可當其講道杏壇轍環天下從之者

大抵多鄙魯之士也然天下之人苟暴不至陽虎惡不
至桓魋未始不傾心焉蓋閱二千年之久五服九州之
遠非獨官署所在法制所當為凡有血氣有知覺具秉
彛好德之心者皆然也顧其訓法在六經者或剽竊以
為文辭或憑藉以取功名而所謂道若判不相涉則雖
廟庭以為尊俎豆以為富徒以為具文觀美而止而亦
何益哉且自科舉之法行士之用世者不能不假文辭
以出然其所為用者舍是道其奚以哉閩自秦漢以來

未見史冊唐常袞為觀察始用文學教之乃有登名進士如歐陽詹之徒者嘗考詹之遺文與韓昌黎所為敘述則詹固以文辭為功名者而止爾及宋道學之說興若楊龜山李延平諸先生皆能推尊孔子之道至朱子而大發明之後之見於道學傳者甚衆至有海濱鄒魯之稱焉福古閩地為今藩會每鄉薦多至數十人繇是掇倫魁躋華要者後先相望仁者之謂仁智者之謂智隨所見而建功立業以是道用於天下者亦有矣聖天

子師尊孔道治必由之闕里之廟聿新舊制天下固有
後志而從好者而大藩首學適值其時是非興學弘化
之幾乎陳君嚮道崇教志圖作人暨藩臬之所規畫郡
縣之所服役可謂善乎其職矣命工立石因特書之而
諸司百執事則備書於石之後

贈固原伯劉公世墓修建記

予每聞縉紳士夫談畿甸間塋墓莊墅之勝云盧溝樹
村有固原伯劉毅敏公墓尤為卓絕蓋公之仲子錦衣

君武所修治者也其中為毅敏公諱玉及夫人某氏次左為公之長子都指揮同知諱文及淑人某氏次右為武之配某氏而虛其壙之半又次左為公季子錦衣衛指揮僉事斌而諸子及婦皆以次祔焉入其門為池為橋為綽楔其中為重門則有誥命諭祭之碑及神道之碑饗祭之堂培築堅厚締構閎壯而工製甚精雖尺木片石無朽缺弗稱者其東偏則為別墅為茂園長得其半廣得其三之一而封樹之事皆備遠而望之翦鬱龍

從謁為佳城周而觀之森聳明秀與甲第無異蓋近時
所鮮見者也武字廷弼年十八即幹蠱為養天順初以
迎鑾功授錦衣正千戶坐累解官乃南游襄漢入雲貴
東抵遼陽北歷大同宣府西至延安臨夏又南至建寧
後居於淮揚往返動萬餘里皆應募輸金穀以濟邊需
既踰六十始攜貲歸京師慨然曰吾半生遠涉川陸備
嘗險難者以圖養計也今父母既逝吾將復何為哉於
是徜徉墓林日夕哀慕思所以用其情者盡於此乎致

之數年而後成愈久而益底其極焉夫聖人之論孝曰
生則盡養沒則盡哀衾槨含斂之為終萊犧俎簋之為
遠皆是也墓之事則無終與遠之義而有之自墨氏之
流以薄為道其弊遂至於無親而後世有識者又以厚
葬為親累二者蓋將取衷焉然制之所得為與力之所
可為往往不能以皆備備矣而或為少艾妻子所移易
則亦有弗暇者於其所弗暇而諉曰葬不可厚亦名教
之罪人也廷弼自謝官職以來其圖養未盡者日蓄月

積皆以為追遠之計是富而善用其財席家廕遵國式
從所得為而力必自致是華而不過其制雖親之貴無
待其顯揚親之壽不逮其奉事而其為孝亦可謂自盡
耳矣且有堂焉以饗則儀物可陳有田焉以耕則粢盛
可備即祭祀之事揆之以堂構播穫之義為劉氏子孫
者可不思所以勿替之哉劉氏本磁州望族毅敏公累
官至左都督贈固原伯豐功大爵實開厥家文為寧夏
副總兵俄僉錦衣衛事宣力中外嘗有志修墓而未果

廷弼獨無所事事故得竟其所為而所以遺其後者亦
遠矣工始於弘治乙卯畢於甲子既告成事廷弼念締
造之艱慮其久而廢也屬翰林張吉士檉詮叙其始末
請記於予將刻石墓前以示來裔予近識其人許其信
義有不啻茲舉者因備書之而其世系履歷之詳載於
碑誌者可互見云

羅氏興復磁龜舊業記

翰林侍讀南城羅君景鳴既興復磁龜舊業乃自叙其

事請記於予其略曰磁龜者有石蹲於溪心若龜然其石
磁石也在南城南八十里其地多重岡複嶺北阻芙蓉
峰又北為臨川西阨連珠峰右西為宜黃南連軍都屬
於南豐之境東則靈峰北迤中通一徑以達於南城實
四達之會也其產多穀間出為赭堊為石脂雲母為礦
為蚌或孕而為珠故其民有以自食且能食四方之來
主者唐宋以來戶至千四百樓觀相望絃誦之聲不絕
元季燬於兵灌莽蒙翳鬼嘯於木虎兕豺豕交於野過

者惻然傷之國朝永樂間吾祖耕隱府君始披荆棘立門戶招集逋徙吾父封編修公益勤安輯於是土著者僑寓者販者游者日源源相續而舊基遺跡猶漫然莫之省也地既有名籍大夫士道吾地者去郡邑甚遠案牘胥隸不可不為之所於是為館於衢之北曰駐驂其南曰寅賓堂室庖湍寢食之具供給之役若驛舍然寅賓之北百十武折而西為御書樓樓之西二百武為聚奎橋橋之上為望遠樓樓之南為坊於門曰翰林者吾

先世之所居也登於斯樓則連珠諸峯之屬於芙蓉者
舉目而盡下極蒼翠為石嶺峽水東流其中舊鑿壁為
磴緣而為徑又跨峽為逍遙樓樓下為門西出為里之
委巷駐驂之西築土為堂隍上為迎暉樓當里之會其
東為解元坊坊左右為鼎新復古二亭又前為市區區
之外為橋南折並山而東三百武登坂之上為義倉為
圭峯書院又東二百武跨溪為龍門橋橋之上為屋十
七楹中為濟川樓又折而北二百武兩山復合於是為

迎恩亭亭之西迤於逍遙之東為門六皆跨於溪為樓
五跨衢及橋者各二凡衢皆甃以甌石凡坊於樓皆塗
以丹雘雖稍復其舊而實有舊所未備者焉既又曰此
吾祖若父之志也而玳也繼為之玳也之子孫又繼為
之則前日之盛可復也然其盛而衰衰而復至於盛者
不可以不記而記之者非可以信天下及後世之言猶
不記也吾之里其亦有遭乎予聽其言察其意若將以
屬予者因為之歎曰天下之盛衰相尋於無窮此理與

數有不得不然者而亦存乎其人故屯與蠱皆有亨之道而非道焉則莫之亨也昔人以洛陽名園繫天下之盛衰然則一鄉一邑亦有關於世運者國家一統百有餘年休養涵育至深至厚故凡遐陬僻壤往往與都邑相類建昌東南文獻地其關於天下也固宜若磁龜所自為盛則處士之孝友封君之勤儉然非刻志礪操以文學鳴世如吾景鳴者亦惡能善繼而肯構之其盛如此哉且蔡邕作魯靈光賦十年不成見王延壽所作而

為之輟翰蘇子瞻欲述錢塘風物見晁補之所作而為之閣筆予何以加於景鳴哉然則景鳴之言雖謂其自信於天下可也羅氏之子孫觀今日之盛而思累世興復之勞且難者未必無感於斯焉因畧為詮次俾刻之貞石以建於所謂磁龜者

懷麓堂集卷六十七

欽定四庫全書

懷麓堂集卷六十八

明 李東陽 撰

文後稿八

記

蜀山蘇公祠堂記

常州宜興之荆溪有蜀山本獨山也志稱蘇文忠公與
蔣學士之奇同舉進士買田卜築于茲山之麓於是易

獨為蜀按爾雅山獨者皆為蜀志又稱愛其名而居之者理則然也公嘗欲作亭種橘預名曰楚頌後上表乞居常及歸自嶺南卒于州邸其弟文定公以其喪去葬于潁上其家亦不復至常當是時蓋有所謂東坡書院者尋輒廢越七十年郡守晁子健擇州學旁地建祠祀公元僧敏機因山為祠為之居守晁公武徐一夔皆有記今常州祠尚存而蜀山祠廢已久弘治庚申縣人沈公暉自南京工部侍郎致仕歸以告撫按暨府縣僉議

既協躬訪遺址悉為居民所據贖而歸之得地三十餘畝為堂六楹肖公像其中寢稱之為左右二亭一刻公楚頌帖及諸詩詞一刻興造之碑東西廡及門各四楹廳館庖湑諸室為楹者以十數其外則甃石為周垣百二十丈視州祠深廣畧稱而偉麗過之矣既乃用表忠觀故事命道士居之咸奉祀焉夫天下之論名臣碩輔者或原于獄降或歸之地靈文章氣節亦以為得江山之助固也及乎遐陬僻壤一丘一壑或有所憑藉亦足

以不朽于世是所謂人與地者恒相須以顯而亦不能不相為重輕若君子去父母之道則遲遲其行越在他國則觸物感事懷思顧戀而不能已是蓋存乎人而物不與焉會稽之東山以謝傳名其在金陵亦築土以象之天下之為東山者何限而非其人莫之名也公之自蜀入洛隱然重京師父子兄弟之名遂擅天下則公乃天下之人俗傳三蘇生而眉山之草木皆枯者妄也及其流離貶竄不能歸其鄉卜居茲山託名以寄意賴之

山名曰峩眉者亦此義耳後雖其體魄在潁而魂氣之無不之者安知不徘徊眷戀于茲山也耶且公所謂不待生而存不隨死而亡者將流行充塞于天地間而況其經過寄寓之地哉公之文章氣節天下莫不尊之是雖不得與于天下之祭揆之鄉先生社祭之義有過而無不及獨山之為蜀也其社之類乎然則是祠之設固耆民俊士衣冠俎豆所宜周旋而傾注焉者也夫使文章不如公氣節不如公則蜀之王萬亦嘗榜鄭郎為蜀

舍而朱俊民劉跂為之記銘然亦不顯東陽楚人而燕
產嘗因贈太師徐文靖公之約買田茲鄉而遽罹家難
竟莫之果工部以其迹頗相類而不知其文之弗稱也
請為建祠事之成予於是亦誠有感焉因用楚語作迎
送神辭其亦橘頌之遺意也夫其辭曰橘之樹兮如蓬
鬱青蔥兮間玲瓏彼亭兮在中信吳邦兮楚風橘之樹
兮如葢米芳鮮兮薦甘脆我公兮來歸神陟降兮如在
公之樹兮荒萊公之亭兮但空苔植我兮構我望游魂

兮歸來公歸來兮恍不可以見渺惆悵兮悠哉荆之土
兮如酥荆之米兮如珠山有茶兮溪有魚生不足兮沒
有餘公去此兮何居楚之調兮歆歆蜀之山兮盤紆神
往復兮無定所聊為此兮踟躕生不為世所容兮沒將恣
其所如鑿余井而得泉兮又安窮其所於彼亭常存兮
樹常實待以薦公兮願少駐乎須臾

澹軒記

澹軒者湖廣寶慶知府致仕東莞王君克敬所自號也

君少從其舅訓導翟君慎學于豐城數歲歸其父處士府君遣就農事君重逆父命躬執耒耜往于田然非其志也既而從容請曰願卒業乃入縣學為諸生領廣東鄉薦越十有三年授廣西慶遠府同知府所屬州多夷地舊長吏至州州置酒致餽相悅樂弗得請輒生猜懼變且不測吏諉夷俗破崖岸因以為利人亦不之訝會東蘭那地二州相關按察檄君往鞠之州各遣人密餽金銀器約千餘兩君正色拒之庭見後不交一談州亦

斂戢不敢以宴請自是會飲之禮遂廢後以家難改福
建泉州府每旬稽戎籍貧而當遣者必為資送或誣相
告引則力為辯釋曰殘民以為功而享其利吾弗忍為
也間以賂請則又曰吾在萬里無人之境未嘗自汙而
於此壞之耶及知寶慶地產茶君性不嗜茶常貢外亦
不以餽人豪家巨賈倍息以病民者必為限制而已不
私焉在官二十餘年無絲竹狗馬之好服食器具悉屏
華美既謝事徜徉林壑間亦幾二十年非鄉社之約不

出也蓋其所謂澹者如此故取以名軒鄉之人亦稱之
謂澹軒先生而不敢字云澹之義蓋取諸水水之澄而
不滓流而不汙物之澹莫如馬人之心惟無所欲則常
澹然以靜自守貴富貧賤隨所處而不為變苟有所欲
則簞食豆羹可以見于色而富於周公者猶附益之若
弗給然其為累豈少哉夫其無累于心者非獨可以善
其身雖措諸事業亦不為勢利所屈撓隨所得為皆
足以用于天下苟合氣於漠寂寞無為如莊子與汨相

遭頽敗委靡散漫不可收拾如釋氏亦何取乎澹而為之也君之為郡禁姦抑暴謹權平價皆盡心力行之其所為澹固其所自處耳故其斂而藏之也吾之所有者固存而物不與焉是豈非君子之道也哉且君以其身教于其家故其子縝為工科都給事中文學論議表見于世而持身儉靜有家法其得乎澹之義者為多以縝為子禮部所舉又奉詔受學于翰林之署俾請予記其所為軒者曰予獨嗜古文而西涯之文則尤嗜者也

顧未之得耳。續代告南海將歸省于家，則為之記。俾持以壽君。時君之年七十有一矣。正德丙寅二月朔日記。

東湖書屋記

東湖書屋者，都察院右副都御史艾君德潤之所居也。湖在南昌城中，周袤十餘里，衆水所匯，下通于江。每春夏之交，天宇澄霽，鏡光無塵，一碧千頃，而或清漣細浪，含風而浴日，乃有禽魚上下，倒景交映，游萍蕩漾，植荷駢列，景象百出，雜然而前陳，探之而不可窮。民居官舍，

緇黃之栖隨所據有各得其勝而漢徐孺子亭在其西南隱然可望焉德潤少在郡庠時嘗擇亢爽之地構屋數楹儲書數千卷種竹數百竿啓扉而眺則一湖之勝舉在目睫棹舫而行則歷覽旁挹無所往而不適因取以名其居且自號云古之地以人勝而人亦或藉地以名其相顯晦相輕重不可以槩論按郡志云豫章東湖猶錢塘西湖皆一郡之勝也西湖古未有名自白樂天始表見于世至蘇子瞻乃益顯其在潁州者亦以蘇及

歐陽永叔而名東湖蓋孺子所居之地而不以名張九齡李紳輩始為賦咏亦未有獨擅其名者向巨原構臨湖閣非洪景廬為之記世鮮知之然則其輕重顯晦託于文章者又如此初德潤之名其居蓋以為藏修游息之地而未顯也及登科踐省歷卿寺以入憲臺內掌武官銓籍共天子羞膳外撫畿甸會財賦之出納茲方訓兵詰武除寇孽于江海之際夙夜勤勵二十餘年無暇乎所謂居與游者顧其勲績所著名必隨之安知天下

之人不指其名而稱之如其所自號者乎東湖之名將自此顯矣德潤之南巡也以其事告予請記書屋其子壻周憲副季鳳以予禮部所舉士故為速予請舉景虛故事而予非其人具為輕重未可知也嘗聞李侍郎若虛居東湖據山水之勝與德潤同郡而異邑謂其居近在湖側若不以相孫者予未暇深考意古稱郡望同姓以之況號以地舉不繫于公籍宜有無嫌于同者試因以諗之若屠都憲元勳亦有是號屠世居嘉興其所謂

湖者殆賴西之比也天下之湖以東名者尚止此乎亦各顯其人而已矣作艾氏東湖書屋記

寧山新阡記

無錫東南一舍許為寧山新阡左塘莊右沈瀆有水環其四周其土脈蜿蜒自西北來數里而茲山出焉蓋鄒氏修靜處士兄弟負土而成為之嘉名以葬其親者也封之穹然而高築之確然而堅中為饗祭之堂其崇踰二丈翼之以碑表之亭其他若止宿之室庖湍之所重

門繚垣各稱其度而亦無苟焉者役以日計者萬費以
緡計者千舉事備物既成而後葬故謂之新阡云爾昔
謝安石築土金陵以象東山是以舊名繫新地司空圖
謂其所居曰休休谷是以舊地易新名其事雖殊而義
各有攸在也山以寧名者益取諸存順沒寧之義非獨
以自寧其身又將以寧其親而定省告面之義亦於是
乎在其地與名皆非因乎舊而為之者也按鄒氏居泰
伯為名鄉祖忠公為望族四百年來世墓聯列多至不

可數其間有宋元碑表者則名字可指識居人過客竦
瞻而佇慕樵童牧豎不敢適而窺焉其不然者丘隴夷
為原隰松柏變為荆榛雖其子孫或不能識故其俗尚
相傳襲苟不託諸文字則雖棺斂之華美封築之堅厚
亦闕然若未始葬者然則茲阡之制不可以不記也予
知世恩久且厚因重違其請而記之

重恩堂記

武進殷君重甫既以嚴州通守致政歸時已有台州貳

守之命重甫雖不復赴官而已進秩階當為奉議大夫
乃具五品服望闕謝今天子登極詔以理致仕者進階
一級重甫不敢當而郡守縣令皆來致命於是其秩又
增階當為朝列大夫復具四品服望闕謝退而告諸家
祠名其所居之堂曰重恩彰上賜也進秩之恩朝廷所
以最功績也未三考而沾不可謂之不蚤進階之恩朝
廷所以獎恬退也既再命而預不可謂之不厚而重甫
乃並得之說者歸之虧盈消長之間似也然亦有道焉

重甫之在官也清慎自律至以家食繼官餼惴惴乎惟人尤官謗是懼其歸田也持志遠利非公事禮際不及于郡縣之庭愈久而不自失焉滄浪有濯纓之歌箕頴有高蹈之勢雖欲強之有不可得而強者今日之命非重甫之宜而誰宜乎抑重甫有弟一人子三人堂構之承繼田畝之疆猷先義官公之業方隆而未艾使其居官就職雖榮且貴然有民社之憂而無天倫之樂校其得失豈不大相遠哉吾於今日之事見之矣重甫之大母

與吾大母為兄弟而重甫吾兄也湖南之行嘗過其舊宅獲拜其先公時斯堂尚未建忽忽三十六年吾年已踰六十而重甫長三歲茲喜其宦成身退而名益榮因記其事寓而書其堂之壁則正德丁卯閏正月八日也

永嘉縣學奎光閣記

溫之永嘉學有奎光閣弘治以前未建也蓋自東晉建學以來至南宋而其制始備其地負華蓋山勝蓋一郡歷代之人才弗絕國朝科目特盛而興替亦不常正德

紀元丙寅姑蘇王君獻臣來知縣事莅學之始見孔子廟大成殿後不數武有容成道院怪而問焉有能道永嘉故事者曰院址實儒宮舊地於是徙道院于其華觀之南復地若干武院之西北亦久為某據聞新令之政亦欣然來歸又復地若干武山若干丈殿之北西又買地若干畝以足之地既廊政亦寢舉欲即院址背山面殿為峻閣以為藏書之所如古所謂尊經閣者顧財力方絀猶豫久不決縣人好義者皆相與相成之為重簷

飛甍畫棟疏牖下軼塵坱上薄霄漢超出雲雨俯視江海盡一郡之勝積書數千卷度置其中以資講誦博聞見非徒為登臨眺望之具也閣既成乃標以今名教諭率諸生而前曰命名之義何居王君曰是取諸列宿所謂文章之府者也傳不云乎聖人之道昭如日星六經者道之精華也夫道根乎人心貫乎倫理見諸民生日用之間天下之所見固然莫殊也乃或蔽於外誘之私則有不能知者於是有復初之學焉有復禮之力焉有

復性之功焉然學必須於博文文之大者莫六經若士之所當尊而習焉者也天下之物有失然後有復茲地之失固可以言復矣不慎以守之能保其終勿失乎物之在外者且然而況於道乎夫苟不知所以復之則所謂老氏者鄰居而襍處非惟不相為謀抑或有誘而去之者聖人之徒縱未能距而攘之而忍為其所誘耶今游斯學者於六經乎取之由誦讀講說之粗極于體驗克擴之大以成文明之治俾功業昭于一時名譽著

于無窮者蓋自昔有之而自今其未艾且益盛也皆再
拜曰敢不於吾侯之言是圖又相與議曰侯之功有不
敢忘者且其仕以名進士其為監察御史執法盡職謫
遠方末職以薦拔今官其所為政多可稱述非茲事止
也是惡可以不記乃具書京師請于予予于禮部之試
得王君知其賢久矣故為之記

進士題名記

國朝每廷試進士必命題名于國子監制也乃弘治乙

丑春三月會試既我孝宗敬皇帝親策禮部所選士賜
顧鼎臣等三百人及第出身有差蓋自庚戌以後至是
凡六策士未幾而龍馭上賓天下臣民銜哀負痛儀節
文字之間有不遑備及者今上皇帝嗣大厯服更化定
治之餘諸司百執事修廢補缺如恐弗逮而題名之制
行焉臣東陽昔預讀卷之列當紀其事以傳職也臣惟
求賢之法古非一途自有科目以來惟進士為重而其
典亦最優蓋士出于閭閻草野之下而入于學校籍于

有司則其名紀于簿札月有稽歲有覈以異乎所謂凡
民者及其試于鄉有司錄之試于京師禮部錄之試于
廷又錄之則皆錄梓摹本家傳而代布其事加久若國
監之題則以天下英才類聚業習之地示之規黻導之
軌轍俾有所接乎耳目而感之乎心於是又刻諸金石
為不朽計此其為事又加久且引於無窮矣夫題名之
說唐已有之然猶出于好事者所自為暨乎後代始令
自朝廷託之金石今國監因元舊址已越百五十年遺

碑斷刻猶有存者于以見求賢之典凡有國者所不能
廢仰惟太祖高皇帝創制立法具在南雍太宗文皇帝
建都定鼎又越三十餘科而獨備于此碑刻羅列後先
輝映其間若公卿輔弼佐理弘化樹豐功著偉績以昭
一代文明之治者實多其人皆指而名之曰某科也
而得某士也今之登是科者尚思先皇帝敷求簡擢之
恩今天子布列任使之命受職膺事隨所得為各務自
盡以酬其所自言者庶幾追古先哲無愧于前人其無

使人指而名之曰某人也而玷某科也夫名以科第爵位言則為榮稱以才行勲業言則為善譽善者可傳而榮非可恃以久故晉穆叔論不朽必曰德與功言孔子疾不稱不畏無聞者非榮之謂也朝廷能與人以榮而不能必其皆善是則存乎其人焉登斯名者惡可以不勉臣謹記

畱福堂記

大理卿張君大經持畱福堂記一軸視予益永樂間禮

部尚書鄭公賜所著以遺其大父者也張氏在勝國時
世家寧國之宣城有隱德鄉人賴之恒願其世饗貴富
處士原甫生四子曄曄晄晄皆通書史尚信義入國朝
洪武間曄為地官郎改刑曹累官湖廣布政司右參政
是為大理君之大父曄從太宗文皇帝靖內難官至武
畧將軍靖海衛千戶後改富峪衛參政公嘗以其伯仲
並顯為先世積德之報在刑曹時取昔人語以畱福扁
官署之堂此記之所以作也參政公亦四子長善次輔

號逸庵是為君父嘗諭大理君曰汝祖為刑官不事苛
刻官不甚顯宜有後報而吾弗克當汝其勉之君痛自
感激攻苦力學舉成化癸卯鄉薦甲辰進士第知鹽山
縣以最績被徵為監察御史歷光祿少卿右通政都察
院右僉都御史至今官封至三代於是參政逸庵皆贈
嘉議大夫大理寺卿而張氏始大顯如鄉人言於戲善
惡存乎人而福與禍係乎天易書詩所謂福者不一而
足益未嘗不本諸善善之於福殆理之所必得而非有

所為而為也。留福之說出於後世，謂以有餘不盡者還之造化，則近于有為而然。然質之詩曰：自求多福。求之云者，豈乘時射利之為乎？亦要諸理焉耳矣。記稱處士公之訓參政曰：汝為法曹，能直人即直我也；若枉人即枉我也。夫古人云：一民饑由己饑，一民寒由己寒之。以身體物亦既切矣，而又以身喻諸其子，豈有子而不愛其親者乎？使其推愛親之心以及乎民，則所以喻之者尤切矣。亦何必身自為之，之為慊哉！大理自為縣以

至持天下之平慎守勤服按律執法惴惴焉若弗稱是
懼予每於章奏間見之校之徇權勢望風旨而無所顧
卹者亦異矣則今日之福固先世之訓之所畱而徒以
福云哉大理君名綸大經字也因以其請為畱福堂後
記

修建廣平府廟學記

廣平府學建于元至正二年入我國朝改路為府置官
建學屢壞屢葺比益加圯正德丁卯知府某議修之會

其費當三千緡未果輒去張君維新繼之榱桷畧具陳
君威又繼去蓋閱三歲歷四守而功弗就緒戊午之春
張君潛來知府事睹而歎曰作舍不成且不可況事之
大者乎乃請于巡撫都御史蕭公紳巡按御史李君嵩
王君潤皆應曰如議退則鳩工聚徒庀材物備稟餼而
後從事閱月而廟成為大成殿八楹高五丈七尺廣九
丈八尺規制甚偉門廡皆畧稱又閱月而學成為明倫
堂為齋為解為號舍皆因舊為新而增置講堂射圃及

庖湎之類無弗備者校初會之費不及其半而民不告
勞官事不廢師儒之講授於斯游歌於斯登降裸獻於
斯者皆為之改視易聽按部之使經行之士夫嘗一再
至者不圖其盛之至於斯也予聞而嘉之因為之說曰
聖人之道原於人心之同慮其不能以皆同也則為之
教顧性道之妙非可得而聞者故其為教不容以不詳
講習撰述程課條格之類皆教之所有事至於祭祀之
禮則出于報本追遠之義心之同然而亦道之一事也

有國與家者必立廟創居室者必先祠堂入學者必舍
菜於先師師之於親一也然則學必有廟自昔已然而
以祭為教者亦惡可徒有其誠而無瞻企對越之地哉
潛在禮部嘗奉使闕里時廟像新設躬睹其所為盛今
職有民社而學與祭又其所得為者其用心於是固宜
或乃謂畿甸之地方有事兵革此非急務抑不知古人
雖在軍旅不忘俎豆矧其事既有緒而又處之各得其
宜亦何靳而不為哉教授某以潛受學於予上京師請

紀成績灝亦通字學手自書刻樹于學宮以俟後之君
子予復繫之以詩曰聖道在人靡間今古晉天之下萬
世是土聖靈在天日月代明人皆仰之萬世猶生學有
條教繇外及內匪利與名惟道所在祭有二義惟本與
文無感弗通有誠則神人皆有心士必希聖彼敷學者
孰敢弗敬夙興夕惕有行必躬春薦秋祠孰敢弗恭黌
宮嚴嚴衿佩規矩殿庭巍巍羽籥容與性道其精文章
其粗有師暨儒惟聖之模神州在畿王化伊邇功在郡

侯書者大史

曾祖考少傅府君誥命碑陰記

右曾祖考贈少傅府君暨曾祖妣贈一品夫人賀氏誥命二首東陽當今上登極時以從龍恩加少傅兼太子太傅戶部尚書謹身殿大學士未幾以恭上太皇太后皇太后尊號恩詔給誥命蓋不待考績而得異數也府君在國朝洪武初以兵籍隸燕山右護衛挈先祖少傅府君以來始居白石橋之傍後廓禁城其地已入北安

門之內則移于慈恩寺之東海子之址生三子其二仲
曰雷曰孔皆生于京師先祖生二子先考及叔皆不逮
府君聞吾祖言府君質直簡默不事侈靡始居北方風
土不相宜因病告解未幾而卒夫人值歉歲大病疫幾
死者數矣間以諭東陽時幼稚不能悉記惟其勤苦累
積之狀可以想見閱三世百有餘年乃得以官職貤封
賜一命而躋于極品予小子曷克臻茲惟我祖之善式
克貽其後而還以自致云爾越既修墓封及累代謹錄

語詞刻之貞石以彰君賜揚祖德掛漏之咎有所不敢
避云

祖考少傅府君誥命碑陰記

右祖考贈少傅府君暨祖妣贈一品夫人陳氏誥命四
首盖自東陽為禮部侍郎已贈及二代及遷太子少保
禮部尚書兼文淵閣大學士以恩詔再贈焉遷太子太
保戶部尚書兼謹身殿大學士未及贈加少傅兼太子
太傅以兩宮尊號恩又贈焉修墓之日乃構兩亭翼饗

堂左右其左則刻後二次所給誥而侍郎誥則不及錄
嗚呼吾祖生于郴州郴州去茶陵三百里而遠茶陵兵
多番成意者曾祖府君以成故居郴說者又傳北上時
生于途而郴非道所經地未知孰是吾祖入京師稍長
即代父役靖難之師實在行伍以功當祿椽吏索米三
斗當得官時大饑米斗千錢府君曰官豈可賂得竟弗
予止得小旗調金吾左衛以藝簡入內局直宿輦轂下
每以新意佐官長官長欲白其功則謝曰我賤者雖功

何孟終其身不以語人純孝無偽刲肉療母夜禱于神以刀寘盜上鏗然有聲不越月而創愈鄉鄰傳而神之或以問焉弗答也遷居海子之西涯坐賈為養不需厚息息日滋則以賙貧者囊無留資性不嗜殺雖蟻蝎之類必縱使得所東陽之少也寔鍾愛之謂吾父贈少傅府君曰天不我負後頗克自立有賀者吾父輒泣曰吾考之慶也祖妣本王氏從舅氏之姓曰陳常之武進人從父上京師禮配吾祖簡默寡言笑躬勤女事家舊藏

祖像布褐服有補綴處皆祖妣手所紉製其儉如此嗚呼孰謂數十年之久乃得封錫之命以為身後榮九原有知其亦有以少慰也夫

先考贈少傅府君誥命碑陰記

右先考贈少傅總庵府君暨先妣贈一品夫人劉氏繼母封一品太夫人麻氏誥命共六首今刻石于饗堂之右與祖考妣誥命正相值而始封翰林院編修誥封侍講學士贈禮部右侍郎兼侍讀學士詔不能悉載也嗚

呼吾考妣之純德餘慶乃至此極哉先考為人誠樸坦
易言若不能出口父疾累歲日侍牀褥至親捧溺器母
嘗病肺嘔血亟跪而吸之皆族黨所親見偕吾叔處怡
怡終日雖濁醪蔬菜必與共醉贅張氏姊育其寡孤出
而復入者三十餘年工書及詩每見東陽書輒不當意
曰書自有法寧可以私意矯揉為之東陽同考禮部有
南士以白金三百兩屬所親告先考先考辭之其人曰
不猶愈於貸乎先考怒曰吾父子寧窮死豈可為不義

辱此考南畿例有供張先考曰慎勿納且酒雖吾所愛
亦不可挈獨不聞薏苡事乎東陽皆奉命惟謹嘗雪
夜歸自外不忍斥責遣孫兆先致一絕云朔風凜凜雪
漫漫詩酒棋枰取次歡何事爾情猶未洽冰霜不問僕
夫寒東陽自是歸不敢到夜戒之終身學士之封具朱
衣請見客輒麾之曰吾不慣此燕後忽得寒疾時值廟
齋東陽歸視湯藥趣赴院曰邏令方急毋以我故犯法
其恭慎至此不亂如此先妣出東安武弁歸先考時年

已踰二十力服勤苦有酒肉供饋外必儲為客具族黨
外內稱為賢淑同然一辭女婦暴厲者或從而化老子
長孫相傳至於今道之不衰嗚呼以吾父之德藝不能
售其身而生封之再命沒贈至一品要諸始終造物者
可謂無負而東陽罪咎深重不自殞滅十齡而失恃四
十而失怙今年踰六十僥冒光寵而不能以一日為養
其何以自立于天地間哉自今未死之年猶冀延一綫
之緒以承祀事然是則存乎天惟盡吾力之所得為者

致存追遠述德紀行傳之不朽謹以君命先焉而附及
其私云嗚呼痛哉

懷麓堂集卷六十八